

03. maj

Inissianik attartortitsisarneq pillugu Inatsisartut peqqussutaata nr. 2, 12. maj 2005-imeersup UPA 2017-mi allanngortinneqarnissaa pillugu Naalakkersuisut suliniuteqaqqullugit inatsisartut aalajangiiffigisassaattut siunnersuut. Taamaaliornikkut atorfirmut atatillugu inigisap sivikinnerpaamik ukiuni tallimani attartoreerneratigut attartortup nalinnaasumik attartukkatut inigilersinnaaqqullugu.

(Inatsisartunut ilaasortaq, Anthon Frederiksen, Partii Naleraq)

Siumumiit siunnersuuteqartoq Anthon Frederiksen, Partii Naleraq qutsavigiumavarput Inatsisartut aalajangiiffigisassaattut siunnersuutaanut, Siumumiillu imaattumik oqaaseqarfigissavarput.

Siusinnerusukkulli Siumumiit oqariartuutigereernikuuvarput soqutigilluinnaratsigu ullumikkut innuttaasut sumiiffippassuarni ineqarniarnerminni atugarisaat pillugit oqallinnissamut peqataasalluta. Matumani aamma inissiani illuniluunniit attartortitseriaatsinut atugassarititaasut pillugit pitsanngorsaaniissamik eqaallisaaniissamillu anguniagaqarneq Siumumiit ilassilluarusupparput.

Siumup pingaartutut isigaa innuttaasoq kinaluunniit akissaqartitsiffigisaminik, najoruminartumik kiisalu isumannaatumik ineqarnissamut pisinnaatitaaffeqassasoq. Kialaamut iserfissaqarluni angerlarsimaffeqarneq nunami maani pingaaqaaq, taamaattumik ineqarneq pillugu inatsisigut pitsanngorsaajuarnissat Siumumiit pingaaruteqartutut isumaqarfigaarput.

Siunnersuuteqartup siunnersuutigaa pisortat inissiaataanni najugaqartut aammalu atorfirmut atatillugu inissiamik attartortittakkamik nalinnaasumik neqeroorfigineqarsimasut ukiuni kingullerni arfineq marlunni najugaqarsimasut najugaq inissiatut nalinnaasumik attartortittakkatut tigusiinnaasaat pillugu piunnaasaqatip ukiunut tallimanut allanngortinneqarnissaa, taamaalilluni atorfirmut atatillugu inigisap sivikinnerpaamik ukiuni tallimani attartoreerneratigut attartortup nalinnaasumik attartukkatut inigilersinnaaqqullugu.

Siumumiit oqareernitsitut ineqarnermut tunngasutigut pitsanngorsaaniissat eqaallisaaniissallu suleqataaffigissallugit pingaartippagut, uanilu siunnersuummi tamanna aamma anguniarneqartutut isikkoqarmat Siumumiit soqutiginninnerput oqaatigissavarput.

Ukiunullu tallimanut piunnaasaqatimik appaaniarnerup innuttaasunut taamatullu attartortunut attartorniartunullu allanut qanoq kinguneqarsinnaanera Siumumiit annertunerusumik paasisaqarfigissallugu isumaqarfigaarput, taamatuttaaq peqqussummi maanna atuuttumi ukiunik arfineq marlunnik ukiuliisimanerup qanoq tunngavilersorneqarsimanera naatsorneqarsimaneralu aamma annertunerusumik paasisaqarfigerusullutigu.

Naggataatigullu Naalakkersuisoqatigiit isumaqatigiissutaanni Ineqarneq pillugu iluarsartuussinissaq 2015-imili ingerlanniagaat sumut killinnersoq Siumumiit paasisaqarfigerusupparput, suleriaqqinnissallu qanoq ittut suullu Naalakkersuisuniit ingerlanniarneqarnersut assorsuaq paasisaqarfigerusullutigik. Pisariaqalivippormi iluarsartuusseqqinnissat timitalersussallugit.

Taamatut Siumumiit oqaaseqarluta siunnersuut aappassaaneerseqartinnagu Sanaartornermut ataatsimiititaliami suliarineqarnissaa innersuussutigaarput.

Anders Olsen
Siumut